

四庫全書

史部

欽定四庫全書

史部

欽定續文獻通考卷

九十  
九十二

總校官內閣中書臣孫溶

欽定四庫全書

欽定續文獻通考卷九十

王禮考

巡狩

臣等謹按馬端臨考所載巡狩訖於宋高宗紹興三十二年孝宗以後無聞焉王圻續通考載寧宗嘉定七年四月幸太乙宮明慶寺禱雨理宗景定四年車駕幸太乙宮赴座官賜醴簪花有太學生

劉黻諫游幸事今以正史考之禮志巡幸亦至紹興三十二年而止餘無可見若帝紀寧宗幸太乙宮係嘉定元年閏四月非七年四月也理宗幸太乙宮紀無其事想以劉黻傳諫游幸疏內有幸西太乙語傳會載之耳又理宗淳祐十年四月己酉幸龍翔宮亦不足為巡狩之典故關焉若遼史營衛志出有行營謂之巴納王圻續通考以冬巴納在廣平淀屬巡狩春在鴨子河灤夏在吐兒山秋

在伏虎林屬田獵其實廣平淀亦有校獵講武事  
不得截然分屬也史稱遼國盡有大漠浸包長城  
之境秋冬違寒春夏避暑隨水草就畋漁歲以為  
常各有行在又稱建有五京歲時巡幸轉徙隨時  
故創立游幸表紀之今若據表以書則重見疊出  
不可勝載且前史別之為游幸則固與古巡狩異  
矣茲第據有事蹟合典禮者具列於左餘概從刪

遼太祖三年正月幸遼東 七年六月登都庵山撫其

先奇善汗遺跡徘徊顧瞻而興歎焉八月幸龍眉宮

帝取

天祐東國博囉三山之勢於葦淀射金鵝箭以識之名龍眉宮後神冊三年築都城於其地即臨潢府九

月癸酉西樓

遼有四樓在上京者曰西樓木葉山曰南樓龍化州曰東樓唐州曰北樓歲時遊獵

常在四樓間

十二月祠木葉山

在遼陽有拜山禮為祠木葉山之儀還次昭烏

山省風俗見高年議朝政定吉凶儀十二月燔柴於蓮花灤

神冊元年二月朔帝在龍化州

在潢河之南受尊號改元

三年十二

月朔幸遼陽故城四年

二月脩遼陽故城以漢氏渤海戶實之改為東平郡五

月至自東平郡

天贊二年二月如平州

以平州為盧龍軍

三

年八月西征次古單于國祭阿勒坦伊德實山以麋鹿

祭九月次伊德實山以青牛白馬祭天地 四年五月

清暑室韋北陁閏十二月祠木葉山又以青牛白馬祭

天地於烏山 天顯元年正月駐軍於輝罕城南二月

以青牛白馬祭天地幸輝罕城

改輝罕城為天福

七月次扶餘

府

扶餘行宮在城西南兩河之間後建昇天殿於此而以扶餘為黃龍府互詳物異考

太宗天顯三年四月東巡 四年正月如昭碣閱約尼

氏戶籍

氏有九帳係約  
尼九汗宮分

三月望祀群神四月至自昭竭

六月西巡駐蹕涼陁七月祠太祖而東八月至自涼陁

九月如南京

先是三年十二月升東平郡為南京此其  
是也至會同元年十一月以皇都為上京

府曰臨潢則又升幽州  
為南京南京為東京矣祠木葉山尋至自南京十月幸

諸營閱軍籍十二月至南京五年三月駕發南京五

月如沿柳湖拜太祖御容於明殿八月如九層臺六

年正月如南京七月東幸七年十二月駐蹕平地松

林九年閏正月東幸十二月駐蹕百湖之西南十



年六月幸頻布里淀十一月幸弘福寺

見觀音畫像顧左右曰昔與父

母兄弟聚觀於此歲時未幾今我獨來悲歎不已乃自製文題於壁以極追感之意

十二月如金

瓶灤

十一年正月如潢河

十二年四月觀潢水源五

月幸頻蹕淀十二月東幸

會同元年二月幸遼河東

三月東幸四月如南京幸溫泉還宮三年三月如南京

此幽州也詔扈從援民者從軍律

幸薊州四月至燕

幸留守趙延壽別墅

六月駕

發燕京冬駐蹕於傘淀

四年九月幸歸化州

五年

二月如南京閏三月駐蹕陽門冬駐蹕赤城

六年八

月如奉聖州十二月如南京 七年九月北幸 大同

元年正月朔備法駕入汴四月朔發自汴州 帝以汴州炎熱水土

難居命改鎮州為中京以備巡幸

臣等謹按帝紀祠木葉山者六

天顯六年五月七年正月十二年十

二月會同二年四月不止天顯四年九月也

如沿柳湖者四

天顯八年五月九年

五月十一年五月不止五年五月也蓋習以為常他若幸涼陞幸頻

蹕淀幸平地松林亦如之故第就初見者錄焉後

倣此

世宗天祿二年十一月駐蹕彰武南 四年九月朔如

山西 五年正月朔如百泉湖夏清暑百泉嶺

穆宗天曆元年九月如南京 三年三月如應州冬駐

蹕奉聖州 四年二月幸南京冬駐蹕杏塢 五年二

月如裏潭 七年二月駐蹕潢河四月還上京 九年

五月如南京六月西幸如懷州十二月還上京 十年

八月如秋山 十二年六月祠木葉山及潢河 十四

年二月如潢河及老林東灤七月祀黑山八月自磴子

嶺還宮 十五年二月東幸十二月駐蹕黑山平淀

臣等謹按帝紀十餘年內駐蹕潢河凡六見裏潭及

黑山平淀凡三見今不悉書

景宗保寧元年十月東幸裏潭十一月祠木葉山駐蹕  
鶴谷 二年正月如潢河四月幸東安五月西幸次盤

道嶺六月還上京 三年二月東幸八月如秋山九月

幸歸化州如南京冬駐蹕金川 四年夏駐蹕永井七

月如雲州 五年二月幸新城七月駐蹕燕子城 六

年正月幸南京十月朔還上京 七年四月如頻蹕淀  
清暑秋山 十年正月如長樂四月西幸六月駐蹕沿

柳湖

臣等謹按游幸表每有為紀所不載者如保寧元

年八月如秋山二年六月幸塔布城遂幸東京三

年七月如沿柳湖十月駐蹕富虎坂五年正月如

神得湖如應州九月駐蹕歸化州西埂坡六年四

月幸冰井七年正月如扎拉淀八年二月如金瓶

淳熙十年三月復如長樂殆即當時巡歷處而互異也

乾亨元年冬駐蹕南京 二年二月如清河四月清暑

燕子城八月東幸 三年二月東幸復幸南京十月如

富虎坂 四年正月如華林天柱八月如西京九月幸

雲州

臣等謹按游幸表元年五月幸惠民湖八月幸冰

井二年閏三月如南京西幸十二月如富虎坂

三年四月幸羊城樂紀不載今參考之皆幸南京  
所過處耳

聖宗統和元年二月幸聖山三月駐蹕遼河之平淀四

月朔幸東京復南幸

幸夫人烏庫哩第謁太祖御容禮畢幸公主和克丹第

如徽

州五月次永州六月還上京八月西巡幸懷州九月幸

祖州還上京如老翁川十二月朔幸顯州復東幸二

年正月如長灤五月駐蹕沿柳湖九月朔駐蹕土河

三年四月朔祠木葉山五月還上京六月如栢坡七月

東幸八月次藁城至顯州謁凝神殿幸乾州觀新宮復  
西幸閏九月行次海上駐蹕東古山 四年二月行次  
梟里井四月朔次南京北郊五月發南京六月度居庸  
闕戊午幸涼陁十月幸南京

臣等謹按游幸表統和元年三月幸甘露寺駐蹕  
長樂及閣旬旁山五月幸興王寺十月駐蹕老  
翁川二年正月幸近地二月如潢河八月幸鷺山  
三年九月渡伯哩水四年五月如炭山清暑此皆



與紀互異者若聖宗紀四年三月帝與皇太后駐  
兵拒宋師及十一月南伐凡所次及所營之處皆  
非巡狩之典故不載又二年正月如長樂後復見  
於三年正月四年正月今亦以習見削之

五年正月如華林天柱三月朔幸長春宮四月清暑冰

井九月幸南京

是冬止馬

六年四月如南京

幸宋國王休格第

七

月駐蹕於洛河八月幸黎園溫湯九月幸南京 七年

正月幸易州御五花樓

撫諭士庶

三月駐蹕延芳淀四月還

京駐蹕儒州龍泉

八年正月如臺湖

十年四月以臺湖為望幸里

如沈子樂五月清暑胡土白山八月駐蹕大王州 九

年三月幸南京四月清暑炭山九月駐蹕廟城 十年

九月幸五臺山 十一年八月如秋山十月駐富虎坂

十二年四月幸延壽寺 十四年十二月幸南京

臣等謹按帝紀自九年四月清暑炭山後每年率

以為常十四年四月六月兩如炭山清暑則更重

複故不書

十五年四月幸南京致祭於太宗廟九月幸饒州致奠  
太祖廟十月朔駐蹕駝山十一月幸顯州十六年正

月如長樂五月祭白馬神祠木葉山尋還上京八月朔  
東幸九月朔駐蹕得勝口十七年九月朔幸南京

十八年正月還自遂城次南京四月駐蹕於清泉淀七

月駐蹕湯泉九月駐蹕黑河十九年九月駐蹕昌平

幸南京二十年三月駐蹕鴛鴦灤二十一年九月

幸女河湯泉

改其名曰松林

十月駐蹕七渡口

二十二年八

月駐蹕犬牙山九月幸南京祭太祖廟 二十四年七

月南幸九月幸南京 二十五年十月駐蹕中京

先是正月

城七金山建大定府號中京

二十六年四月朔祠木葉山五月朔

還上京駐蹕懷州十月朔幸中京 二十七年四月朔

駐蹕中京

營建宮室

八月北幸十二月南幸又如中京 二

十八年五月朔如中京清暑七金山八月幸中京 二

十九年四月清暑隆科塢十月駐蹕廣平淀十一月幸

顯州

臣等謹按帝紀自十五年至二十九年凡清暑炭  
山者十一幸長春宮者二幸延芳淀者三如長樂  
者二如駕鵞灤者五駐蹕七渡河者二駝山則十  
五年十月十二月兩見廣平淀則二十九年十月  
十二月兩見今皆錄其初見者

開泰元年正月駐蹕王子院二月駐蹕瑞鹿原如葦灤  
五月朔還上京十月如中京

臣等謹按帝紀統和三十年十月朔即改元開泰

乃游幸表仍稱三十年而以明年為元年自是至  
太平十年俱遞差一歲此史氏之疎也

二年四月如緬山十月駐蹕長灤三年正月如渾河

七月朔如平地松林八月朔幸沙嶺十月朔幸中京

四年二月朔如薩題灤四月駐蹕沿柳湖七月幸秋山

十月駐蹕塔喇噶灤十二月南巡海徼還幸顯州五

年正月北幸駐蹕雪林四月清暑孤樹淀八月自懷州

還上京九月駐蹕杏塢六年正月如錐子河四月如

涼陘五月祠木葉山潢河駐蹕九層臺九月還上京十  
月駐蹕達哩山十二月還上京 七年二月如渾河九  
月駐蹕中京 九年二月如鴛鴦灤九月駐蹕金瓶灤  
十月如中京

臣等謹按帝紀開泰凡九年內如緬山者三如瑞  
鹿原薩題灤達哩山土河川者各二今第錄其一  
以省繁冗

太平元年正月如渾河二月幸鉞河四月清暑緬山七

月如沙嶺九月幸中京 二年二月朔駐蹕魚兒灤三

月如長春州九月駐蹕和爾果斯淀十月如上京 三

年五月清暑緬山七月賜緬山名曰永安 十月駐蹕遼河 四年

正月如鴨子河二月詔改鴨子河為混同江塔魯河為長春河 五月清暑永安

山七月如秋山 五年正月如混同江三月如長春河

九月駐蹕南京是歲燕民以年穀豐熟車駕臨幸爭以土物來獻帝禮高年惠鰥寡賜酺飲至

夕六街燈火如晝士庶嬉遊帝亦微行觀之 六年正月如鴛鴦灤九月駐

蹕遼河澌 八年九月幸中京 九年正月至自中京



二月如幹凜河七月朔如黑嶺十一月如顯陵 十年

二月幸龍化州四月如乾陵五月清暑柏坡十月駐蹕

長寧淀 十一年六月駐蹕大福河之北十一月

時興宗已

即位

謁慶陵名其山曰慶雲殿曰望仙

即道宗陵也

臣等謹按帝紀太平七年如混同江清暑永安山

俱與五年同游幸表誤以五年作四年則由開泰

以二年為元年所誤也又此十一年中清暑緬山

駐蹕遼河如魚兒灤如永安山如混同江如長春

河皆數見俱不贅

興宗重熙元年正月如雪林四月清暑已納登八月駐蹕拉河源十月幸中京二年正月東幸八月幸溫泉

宮三年正月如春水七月如秋山十月駐蹕中會川

四年正月如伊蘓布琳五月清暑散水源十月如王

子城行柴冊於白嶺

積薪為壇受群臣玉冊禮畢燔柴祀天蘓爾威汗制也

五

年五月南幸如呼圖哩巴山清暑十月幸南京六年

正月西幸十月駐蹕石寶岡七年三月如蒲河淀七

月如黑嶺十月如遼河駐蹕白馬淀 八年十月駐蹕

東京

臣等謹按帝紀九年至十一年凡所駐蹕處皆前所習見故不載

十二年三月幸南京五月幸山西 十三年十二月幸

西京

先是十一月改雲州為西京

十四年二月駐蹕察哩灤 十五

年七月觀穫如秋山

禁扈從踐民田

十六年三月如黑水灤

十月幸中京謁祖廟十一月幸中京 十七年十月駐

蹕都爾嘉

六院官屬  
秋冬居此

十九年三月駐蹕錫錫淀六月

幸慶州謁太安殿七月駐蹕科里富僧額二十年二

月如蒼耳濼二十一年十月幸顯懿二州二十二

年六月駐蹕胡品山七月如黑嶺二十三年六月如

慶州十月駐蹕中京

幸新建  
秘書監

有事於祖廟二十四年

五月駐蹕南崖七月如秋山次南崖之北峪

臣等謹按帝紀無歲不巡幸今俱闕其重見者又

三年載正月庚辰如鴨子河考河之名已改混同

江矣

道宗清寧二年九月幸中京祭聖宗興宗於會安殿

三年二月如大魚灤 五年六月朔駐蹕納克灤十月

朔幸南京祭興宗於嘉寧殿 六年十月駐蹕藕絲淀

八年六月朔駐蹕圖古勒十二月幸西京 九年五

月清暑和爾和七月如太子山 十年正月北幸九月

幸懷州謁太宗穆宗廟十月朔駐蹕中京 咸雍元年

十月朔幸瑩巫閭山 二年正月幸山榆淀 三年二

月北幸 六年正月如千鵞瀛 八年四月駐蹕圖埒

實 九年正月如雙瀛四月如旺國崖十月幸陰山遂

如西京 十年九月幸東京謁二儀五鸞殿 太康元

年二月駐蹕大魚瀛四月如犢山 三年二月以中京

饑罷巡幸四月泛舟黑龍江 四年二月駐蹕縹古野

五年十二月幸西京 七年九月次懷州又次祖州

大安元年十月駐蹕好草淀 二年四月北幸九月

還上京 三年三月如錦州九月駐蹕錫里濟 四年

四月西幸 五年五月駐蹕齊老嶺 壽隆元年五月

駐蹕特里嶺 二年正月駐蹕色呼森六月駐蹕薩里

布

次年五月亦駐其地六月詔每冬駐蹕之所宰相以下構宅毋後其民

五年七月如

大牢古山 六年七月如沙嶺

天祚帝乾統三年十月如中京 四年十月幸南京

五年六月幸哈爾吉 十年六月清暑玉邱 天

慶二年十月駐蹕奉聖州十一月幸南京謁太祖廟

七年九月帝自燕至陰涼河十月至中京

臣等謹按帝紀金兵相逼後播遷無定并非游幸更不可言巡狩矣故自此至保定年間事俱削之

四時巡狩

契丹大小內外臣僚并應役次人及漢人宣徽院所管百司皆從漢人樞密院中書省惟宰相一人樞密院都副承旨二人令書十人中書令史一人御史臺大理寺選擇一人扈從每歲正月上旬車駕啟行宰相以下還於中京居守行遣漢人一切公事除拜官



僚止行堂帖權差俟會議行在所取旨出給誥勅文  
官縣令錄事以下更不奏聞聽中書銓選武官須奏  
聞五月納涼行在所南北臣僚會議十月坐冬行在  
所亦如之

臣等謹按營衛志四時巡狩即列於已納之後是  
與田獵為一事也但猶可見巡狩之制故附錄焉  
若四時已納則全屬田獵門詳見於後

金太宗天會八年七月如東京溫湯 十年七月如中

京十月如興中府

臣等謹按帝紀十二年正月復如東京絕無事跡  
可見故闕之

熙宗天眷元年二月如約羅春水幸天開殿四月朝享

於天元殿

約羅有混同江行宮是年以春亭名天元殿安太祖太宗徽宗及諸后御容春亭者太祖

所常御之所也

三年四月如燕京六月次涼陁九月至燕京

親饗太祖廟

皇統元年九月至自燕京四年二月

如東京次泊河春水五月朔次薰風殿九月復如東

京

十月詔薰風殿二十里內及  
巡幸所過五里內並優一歲

五年二月次濟州春

水

時右諫議大夫程杲上疏謂古者天子皆有巡狩無  
非事者或省察風俗或審理冤獄或問民疾苦以布  
宣德澤國家肇興誠恐郡國新民逐末棄本習舊染  
之汙奢侈詐偽或有不明之獄僭濫之刑或力役無  
時四民失業今鑿輅省方將憲古行事願委之長貳  
釐正風俗或置匭篋以申冤枉或遣使郡國問民無

告皆古巡狩之事如此則和氣通天下丕平可坐而待也帝嘉納之

臣等謹按帝紀天眷二年皇統二年五年八年俱有幸天開殿事又六年有如春水事今以複見不書

海陵天德四年二月如燕京次泰州五月次臨潢府六月朔駐縣山八月次於達斡九月次中京 貞元元年

二月自中京如燕京三月至燕京

初備法駕

臣等謹按帝紀及地理志先是天眷元年八月以京師為上京府曰會寧舊上京為北京天德三年四月詔遷都燕京至是改元改燕京為中都府曰大興汴京為南京中京為北京云

正隆六年六月次南京近郊

左丞相張浩率百官迎謁備法駕入京城

是年正月將如南京命參知政事李通諭宋使徐度等曰昔從梁王軍樂南京風土常欲巡幸今營繕將畢功期以二月末先往河南帝王巡幸自古有之以

淮石多隙地暫欲校獵其間從兵不踰萬人况朕祖  
宗陵廟在此安能久於彼乎汝等歸告汝主令有司  
宣諭朕意使淮南之民無懷疑懼二月發中都三月  
次河南府幸汝州溫湯視行宮地自中都至河南所  
過麥皆為空復禁扈從母輒離次及遊賞飲酒犯者  
罪皆死而莫有從者四月發河南府次溫湯戒扈從  
母輒過汝水是月自汝州至南京百官迎法駕入京  
世宗大定元年十一月

此月前即正隆六年十月也

如中都十二月

至中都謁太祖廟御殿受朝

詔軍士自東京扈從至京師者復三年

三

年六月觀稼於近郊 四年正月如安州春水

大雪詔扈從人

舍民聚者人日支錢一百與其主并有蠲復事詳賑卹門

九月朔還都 六年三月

如西京

即大同府因遼舊名

朝謁太祖廟九月朔至自西京 七

年閏七月觀稼於近郊者三九月次保州

詔修起居注王天祺察訪

所經過州縣官

十月還都

臣等謹按七年九月次保州以秋獵也應入田獵

門然察訪長吏不失省方之意故附錄於此

八年五月如涼陁 十年五月如柳河川 十二年二

月如順州春水五月如百花川次阻居久旱而雨觀稼禁扈從蹂踐民

田六月如金蓮川本和爾和八年改今名自後頻幸其地 十八年正月

如春水二月次華港尋還宮帝巡幸所至必訪官吏臧否以玉田簿舒穆魯沓為

能投本 十九年五月幸太寧宮駐蹕月餘 二十年正

月幸石城縣行宮以玉田縣行宮之地偏林為御林大淀灤為長春淀 二月還都

二十一年正月次永清縣如春水也至二十三年正月詔夾道三十里內被侵

之民與免今年租稅仍給傭直互見賑恤門



臣等謹按帝紀二十三年正月如春水二十四年

正月如長春宮春水蓋歲以為常故不贅錄後倣

此

二十四年五月帝幸上京

海陵貞元二年還都於燕削上京之號止稱會寧府大定

十三年七月  
復稱上京

先是二月帝曰朕將往上京念本朝風俗重端午比

及端午到上京則燕勞鄉閭宗室父老三月如上京

皇太子監國宰執以下奉辭於通州四月次廣寧府

次東京朝謁孝寧宮

給復東京百里內夏秋稅租一年在城隨闕年七十者補一官

由數百里內犯徒二年以下罪互見賑恤等門

至是抵上京居於光興宮朝

謁於慶元宮宴於皇武殿

帝謂宗戚曰朕思故卿積有日矣今既至此可極歡

飲君臣同之

六月幸阿勒楚喀水臨漪亭閱馬於綠野淀十一月還

宮 二十五年二月如春水四月至自春水

是時又有曲赦會寧

府并放免租稅老民補官等

發上京五月次天平山好水川

有行宮地屬臨

漢府是年七月發好水川九月次轄沙河

賜百歲所命名也

次遼

水

召見百二十歲女直老人能  
道太祖開創事帝嘉歎賜帛至自上京

臣等謹按金史路布達傳帝將幸上京大理司直  
路布達上書諫謂人君以四海為家豈獨舊邦是  
思不報及將發上京帝謂宰臣曰上京風物朕自  
樂之每奏還都輒用感愴祖宗舊邦不忍捨去萬  
歲之後當置朕於太祖之側卿等無忘朕言迨宗  
室戚屬奉辭又謂朕久思故鄉甚欲留一二歲特  
以京師天下根本不能久於此耳蓋帝之用意並

非在於田游也故考帝紀補錄之

二十七年四月如金蓮川九月朔還都

帝嘗欲幸金蓮川有司具辦薛王府椽梁襄上疏曰  
金蓮川在重山之北自古極邊荒棄之壤也氣候特  
與上京中都不同尤非聖躬將攝之所凡奉養之具  
無不遠勞飛輓其費數倍至於頓舍之處軍騎闌塞  
主客不分奪攘蹂躪未易禁止輿臺皂隸不免困踣  
一夫致疾染及衆人夭傷無辜何異刃殺秋杪將歸

人疲馬弱裹糧已空褚衣已敝猶且遠幸松林以從  
畋獵設風暴塵漲宿霧四塞以致翠華有峻陵之避  
襄城之迷百官狼狽於道路衛士參錯於隊伍當此  
寧無戒悔乎所次之宮殿宇周垣惟用氊布押宿之  
官上番之士驅馳饑渴已不勝倦更使徹曙巡警露  
坐不眠何以克堪又行幸所過山徑阻修林谷晦靄  
上有懸崖下多深壑垂堂之戒不可不思且燕京之  
涼非濟南之比陛下牧濟南日每遇炎蒸不離府署

今九重之內宴安穆清何暑可到議者謂陛下北幸  
久矣每歲隨駕大小歌舞而歸今茲再出寧有遽不  
可者夫事知其不可猶冒為之則有後患必矣或又  
謂往年遼國春水秋山冬夏已納舊人猶喜談之陛  
下效之耳臣愚以為三代之政今有不可行者况遼  
之過舉哉且遼之基業根本在山北之臨潢其所遊  
不過臨潢之旁亦無重山之隔本朝皇業根本在山  
南之燕豈可捨燕而之山北乎或又謂前世守文之

主生長深宮畏見風日陛下監其如此不憚勤身遠  
幸金蓮至於松漠名為坐夏打圍實欲習勞講武臣  
愚以為事貴適中今過防驕情之患先蹈萬有一危  
之途何異無病而服藥也乞發如綸之旨回北轅之  
車塞雞鳴之路安處中都不復北幸則宗社無疆之  
休天下莫大之願也世宗納之遂為罷行

臣等謹按史書世宗幸金蓮川者凡七大定十二  
年六月十四年五月十六年四月十八年五月二

十年四月二十二年四月二十七年四月是也梁  
襄此諫史傳闕其年月王圻續通考則與二十四  
年路布達諫幸上京合為一事以為時將幸上京  
布達書奏不納後襄上疏極諫帝為罷行今考地  
理志上京路即海古之地金之舊土阿勒楚喀水  
發源於此國言金曰阿勒楚喀故名金源建國之  
號本此其水又有混同江來流河宋瓦江鴨子河  
若金蓮川則在桓州屬西京路世宗改和爾和東



川名曰蓮者連也取金枝玉葉相連之義其地有  
涼陞查沙白灤景明宮揚武殿在焉疏中固言其  
地與上京中都氣候不同則金蓮之非上京明矣  
且世宗幸上京為後世巡遊盛典與漢高過沛光  
武幸南陽並光武冊初無罷行之事王圻畧而不  
載乃與諫幸金蓮牽連書之何未詳考耶

二十九年

時章宗  
已即位

五月觀稼於近郊八月還宮

自是率  
以為常

章宗明昌元年正月如近畿春水二月至自春水九月

如秋山十月至自秋山

宋濂集題王庭筠秋山應制詩曰金源之制每歲以正月如春水九月幸秋山五日之間羣臣一進起居表其嚴慎如此之至者志非在於田遊將欲修兵政而紓民賦也道陵如薊門至秋山河東王庭筠以翰林修撰扈從左右應制賦詩甚被獎眷蓋自大定以來累洽重熙文物聲明可擬漢唐故其一時君臣遇合天施地受雨露無際緣物引興

決於太和此乃金極盛之時自當時言之孰不效  
上林羽獵以侈大榮觀而庭筠乃能以秋山不合  
園為風其亦良士也哉

五年四月幸景明宮五月次烏蘇薩巴六月如冰井如  
查沙八月至自景明宮

先是四年三月將幸景明宮時民饑不可行御史中丞  
董師中等上書切諫謂勞民傷財蓋其小者今邊鄙  
不馴反側無定必里克巴嗜貪暴強悍深可為慮何為

冒不測之悔哉不報越二日師中等又上疏謂近年水旱為沴今方春東作亟遣有司修建行宮事屬不急西北二京臨潢諸郡比歲不登加以民有養馬簽軍挑壕之役財力大困米價甚貴若扈從至彼又必增價恐饑餓之徒將必復有如曩歲殺太尉馬毀太府瓜果出忿怨言起而為亂者可不畏哉左補闕許安仁右拾遺路鐸亦皆上書諫謂漢唐雖有甘泉九成避暑之行然皆去京師不遠非如金蓮千里之外

却沙漠隔關嶺萬一有警何以應變殊可慮也是日  
帝御後閣召師中等賜對仍諭輔臣曰朕欲巡幸山  
後無他不禁暑熱故也民間缺食處甚多朕初不盡  
知既已知之暑雖可畏其忍重民之困哉遂罷幸至  
是師中等復先後兩上封事切諫不報六年十月詔  
以歲幸春水秋山五日一進起居表自今可十日一  
進

永安元年五月朔觀稼於近郊

因閱  
區田

五年正月如春

水

論點檢司車馬所  
至仍公百姓市易

泰和元年九月如秋山

臣等謹按宋濂題王庭筠應制詩謂詩序中所云

九日即是年九月丙辰道陵於是月甲寅發京師  
二十九日丙子至自秋山道塗所歷凡二十有三  
日其幸香林平頂山溫泉等什皆可以次而推云  
又按帝紀永安三年正月名都南行宮曰建春四  
年元三幸之泰安二年五月如泰和宮諭有司曰  
金井已納不過二三日留止一涼厦足矣若加修

治徒費人力其藩籬不急之處用圍幕可也更泰  
和宮曰慶寧長樂川曰雲龍又勅御史臺京師拜  
廟及巡幸所過州縣止令灑掃不許以黃土覆道  
違者糾之七月有司奏還宮日請用黃麾仗不許  
八月還宮三年十二月勅行宮名曰光春其朝殿  
曰蘭皋寢殿曰輝寧四年五年八年並幸其地又  
歷年所幸之處有西園東園錦屏山玉泉山太極  
宮等名并附錄之

元世祖中統元年十月車駕駐錫衮之地

命給官錢雇在京索駝運

米萬石輸行在所

十二月至自和州駐蹕燕京近郊 四年二

月車駕幸開平

詔北京運米五十石赴開平其車牛之費並從官給升開平府為上都

八月

至自上都

自後屢臨幸之

臣等謹按帝紀自中統四年升開平為上都至

元年間凡十七幸不悉書

葉子奇草木子曰世祖以大興府為大都開平府

為上都每年四月迤北草青則駕幸上都以避暑



頒賜於其宗戚馬亦就水草八月草將枯則駕回  
大都自後歲以為常惟每歲往來於兩都間他無  
巡狩之事山岳河海惟遣使致祭別無封禪繁縟  
之禮震耀古今然亦莫掩其盛也

至元十八年正月車駕幸涿州二月幸柳林 二十五

年三月駐蹕野狐嶺

如上都也

七月次蘇尼巴雅爾之地九

月至大都三十一年

時成宗已即位

九月駐蹕三部落

時聖誕節

臣等謹按元史董文同傳成宗既即位巡狩蹕音

布拉之地翰林承旨董文同奏巡狩不以時還無以慰安元元宜趣還京師帝即日可其奏

成宗元貞元年二月車駕幸上都

時監察御史崔敬諫巡幸上都宜御內殿其畧曰世祖以上都為清暑之地歲常行幸閣有大安殿有鴻禧睿思所以保養聖躬適起居之宜存畏敬之心若實喇鄂爾多斯乃先皇所以備宴游非常時臨御之所今方以孝治天下屢降德音祇行宗廟親祀之禮

雖動植無知罔不歡悅而國家多故天道變更顧大  
駕還大內居深宮嚴宿衛與宰臣謀治道萬幾之暇  
則命經筵進講究古今盛衰之由緝熙聖學乃宗社  
之福也

大德三年二月朔幸柳林

臣等謹按帝紀每歲二月三月幸上都至九月十  
月還大都至武宗仁宗英宗泰定帝四朝每歲幸  
上都俱如之茲不具載

武宗至大四年

時仁宗已即位

閏七月車駕如大都

先是元年三月幸上

都五月以諸王及僧徒駕者途中擾民禁之至是太后以秋稼方盛勿令鷹坊駝人衛士先往庶免害稼擾

民勅禁

止之

英宗至治二年三月幸柳林

先是正月建行殿於柳林

六月朔至五

臺山

禁扈從宿衛毋踐民禾

臣

等謹按本紀泰定帝泰定三月七月幸大乾元

寺四年二月狩于鄴州王圻本錄之然考其時一

則勅鑄佛像一則係行田獵無關巡狩故闕焉

文宗天曆元年十二月幸大崇恩福元寺謁武宗神御

殿

次年正月  
還幸之

至順元年五月發大都次大口次龍虎

臺六月至上都

至閏七月駕將還勅上都兵馬司官二人率兵士由偏嶺至明安巡邏以防盜

八月還至京師 二年五月幸上都八月南還大都

三年五月發大都時巡於上都

順帝元統二年四月時巡上都九月還自上都

臣等謹按帝紀自後至元年間每歲二三月時巡

上都至六月還大都又至正元年至十八年每歲

以四月時巡上都八月還大都茲不具載

明太祖洪武元年四月幸汴梁五月改汴梁路為開封府閏七月至自開封八月己巳以應天為南京開封為北京壬午幸北京改大都路曰北平府八年四月辛卯幸中都丁巳至自中都

帝謂羣臣曰每詢儒者皆言有天下者非都中原不能控制朕心不忘洪武初年定中原朕即至汴意在達都以安天下及觀民生凋弊轉輸維艱恐益勞民

遂命羣臣會議皆曰濠地古之鍾離于此建都庶合  
古今之宜以此更郡名為鳳陽府立都城土木之役  
實勞民力功將告成惟上帝后土是鑒丁巳詔罷中  
都役作

明法傳錄曰帝之幸中都也命皇太子秦王楚王  
靖江王誨武中都詔太子贊善宋濂長史趙璫等  
從既行帝閱輿地志得濠梁古蹟惟塗荆二山最  
著皆在鍾離縣西八九十里間岡巒相屬淮水繞

荆山之陰神禹鑿之水始流兩山間民免修阻之患昔人所謂觀河洛者思禹功此亦一大觀也皇太子過中都乃往遊焉命濂作記其諸古蹟濂隨處進說甚有規益事畢還京師

成祖永樂七年二月乙亥遣使於巡狩所經州縣存問高年

八十以上賜酒肉九十加帛

辛巳以北巡告天地宗廟社稷壬

午發京師三月甲辰次東平州望祭泰山辛亥次景州

望祭恒山壬申至北京

先是元年正月北平為北京

六月壬申察北



巡郡縣長吏 八年九月幸天壽山

先是七年五月營山陵於昌平封其

山曰天壽

十月丁酉發北京十一月甲戌至京師 十一年

二月甲子幸北京乙丑發京師命給事中御史所過存

問高年

賜酒肉及常

四月己酉至北京

十四年九月戊申

發北京十月癸未至京師 十五年三月壬子北巡發

京師

四月己巳次鄧城申禁軍士毋踐民田穡有傷者除今年租或先被水旱適租亦除之

五月丙

戌至北京

宣宗宣德三年八月丁未帝自將巡邊九月辛亥次石

門驛乙卯出喜峰口

大破烏梁  
海於寬河

癸酉至自喜峯口

先是七月丁酉太師英國公張輔上扈從士馬之數  
命行在戶部每卒給一月行糧加麥三斗為乾餼工  
部給胖襖襦鞋戊戌命太僕寺選民間所畜官馬給  
騎卒壬寅命兵部凡扈從文武官及將軍悉準永樂  
中例給脚力馬騾及其僮從悉給行糧勅通州三河  
薊州遵化軍衛有司諭以將親巡遄毋科擾軍民以  
為進獻道路可通行足矣毋勞民修治勅都督陳景

先修灤河橋癸卯命少師蹇義等三人禮部尚書胡濙等六人各率其屬扈從仍諭諸將嚴紀律申號令軍容必肅毋擾百姓

九年九月癸未自將巡邊乙酉度居庸關丁酉至洗馬林閱城堡兵備十月丙午還宮

臣等謹按帝紀正統十年十一年十二年十四年三月內並如上又天順成化兩朝有幸南海及西苑事應入田獵門故不載

武宗正德十二年八月甲辰帝微服如昌平丙辰至自

昌平

時大學士梁儲蔣冕毛紀於次日乙巳追及於沙河  
請回蹕不聽已酉至居庸關巡關御史張欽閉關拒  
命乃還

臣等謹按本紀九年二月帝始微行自十二年後  
無歲不出半屬微行固不得列為巡狩然興黃輦  
等六人諫巡幸之獄舒芬等百有七人先跪而後



旋伏刑誅而武宗之貽笑千秋豈能掩乎

世宗嘉靖十八年二月乙卯幸承天辛酉次真定望於  
北嶽丁卯次衛輝三月己巳渡河祭大河之神辛未次  
鉅州望於中嶽庚辰至承天甲申享上帝於龍飛殿奉  
潔宗祀於國社國稷徧羣祀四月壬子至自承天甲  
子幸大峪山丙寅還宮九月辛酉如天壽山十月丙寅  
還宮神宗萬曆十六年九月甲子次石景山觀渾河一  
丑還宮

臣等謹按帝紀神宗自十九年四月享太廟是後  
廟祀皆遣代凡晏處深宮者幾三十載光熹以後  
朝政多故絕少巡狩事故闕如焉

欽定續文獻通考卷九十



欽定四庫全書

欽定續文獻通考卷九十一

王禮考

田獵

遼太祖神冊四年正月射虎東山 天贊三年十月朔

獵寓樂山

獲野獸數千  
以充軍食

十一月射虎於烏蘭實呼山抵

巴克實山六百餘里且行且獵

日有鮮食  
軍士皆給

臣等謹按帝紀又載九年十月釣魚於鴨綠江神

冊五年五月射龍於伊喇山陽水上考古者畋漁  
並稱馬端臨亦載春秋矢魚於棠事然其意在論  
田獵不在魚也遼頭魚頭鵞不異於射虎射鹿故  
釣魚事並附錄之若射龍則已見於物異考矣又  
遊幸表載田獵事不可勝書今俱從畧

太宗天顯三年三月東蒐獵殺羆山及松山四月祭鹿  
鹿神

違俗好射鹿每出獵必祭其神以祈多獲

於獵所縱公私取羽毛革

木之材又獵三山五月獵索囉山 四年六月西巡選

輕騎數千獵近山 八年五月獵獨牛山 十年七月  
獵南赤山 會同元年二月獵松山 二年三月畋於  
裏潭之側 三年三月獵水門七月獵哈達拉山 八  
年七月獵平地松林

臣等謹按帝紀天顯四年十一月觀漁三义口七  
年八月捕鷲於沿柳河九年正月漁於土河十一  
年正月釣魚於土河會同二年十二月亦如之附  
錄於此

穆宗應曆二年九月獵炭山十二月獵於近山 七年

十月獵於七鷹山 八年七月獵於伊喇山迄於九月

射鹿諸山 十一年四月射鹿 十二年如黑山赤山

射鹿 十三年四月獵於潢河八月幸近山呼鹿射之

旬有七日而後返 十一月獵飲於虞人之家凡四日 十二月射野鹿賜虞人物

有差 十四年五月射舐齾鹿於白鷹山至於決句 六月朔獵

於玉山竟月忘返八月如磴子嶺呼鹿射之獲鹿四賜虞人女瑤

等物有差 十七年九月朔獵於黑山赤山至於月終 十

八年秋獵於西京諸山九月獵熊 十九年二月如懷  
州獵獲熊歡飲方醉馳還行宮

臣等謹按帝紀應歷十五年有獲鵞除刑復徭偵  
鵞失期加刑事詳刑考又十六年獲鵞獲鵞觀野  
鹿入馴鹿羣十八年獲鵞於碩格水俱有歡飲事  
史謂畋獵無厭賞罰無章嗜殺不已變起肘腋此  
皆不可為典禮故闕而不錄

景宗保寧六年七月獵於平地松林 九年十二月獵

於近郊

以所獲  
祭天

時耶律幹拉為護衛車駕獵顏山適豪豬伏叢莽帝射中之猪突出御者圖們捨轡而避旣人和拉翼之

幹拉射猪斃之帝嘉賞及獵赤山適奔鹿奮角突前路隘不容避垂犯蹕幹拉以身當之鹿觸而顛帝謂

曰朕因獵兩瀕於危賴卿以免遷護衛太保

按遊幸  
表帝獵

顏山係十

年三月事

乾亨元年十一月南院樞密使兼政事令郭襲上書諫

畋獵帝嘉納之

襲諫書略云昔唐高祖好獵蘇世長言不滿十旬未足為樂即日罷獵史稱其美伏念太祖創業艱難修德布政宵旰不懈穆宗逞無厭之欲不恤國事天下愁怨今海內翕然望中興之治十餘年間征伐未已而寇賊未弭年穀雖登而瘡痍未復正宜戒懼修省以懷永圖聞恣意遊獵甚於往日萬一有銜檠之變搏噬之虞悔將何及況南有強敵伺隙而動聞之得

無生心乎伏望節從禽酣飲之樂生靈社稷有無疆  
之休帝覽而稱善

四年九月獵於祥古山

聖宗統和元年八月獵赤山 二年二月獵於長樂川

五年七月獵平地松林 六年十二月畋於沙河

七年五月獵桑乾河十一月獵於好草嶺 十年十二

月獵儒州東川 十二年十月獵汗州之西山 二十

七年正月獵於瑞鹿原



臣等謹按帝紀十五年八月復獵於平地松林皇  
太后誠曰前聖有言欲不可縱汝為天下主馳騁  
田獵萬一有銜極之虞適貽予憂其深戒之然自  
後二十九年秋太平五年七月八年七月俱有獵  
於平地松林事

開泰元年正月獵於噶哈哩嶺 二年十月朔畋廐井

之北 三年正月畋潢河濱

越教日又有及皇后獵稿  
瓦原事明年正月又命詳

萊已古洛水瑞  
急原以備春蒐

四年正月獵馬蘭淀七月幸秋山自

八月射鹿至於九月復自癸丑至於辛酉連獵於有栢  
碎石太保響應松山諸山 五年九月帝同皇弟隆慶  
獵於松山 南京留守秦晉國王隆慶來朝帝  
親出迎勞於實得山因同獵焉 六年十

月獵鐸子河

臣等謹按王圻續通考載興宗景福十七年秋大  
獵帝射虎以馬馳太速矢不及發虎怒奮勢將犯  
蹕左右辟易時敦睦宮太保兼掌圍場事陳昭衮  
捨馬捉虎兩耳騎之虎駭且逸帝命衛士追射昭

袞大呼止之虎雖軼山昭袞終不墮伺便拔佩刀  
殺之舉至帝前慰勞良久即日設燕悉以席上金  
銀器賜之特加節鉞遷圍場都太師賜國姓命張  
儉呂德懋賦以美之今考遼史陳昭袞傳乃開泰  
五年事王圻續通考誤也

太平元年二月幸鉞河獵高柳林七月賜從獵女真人  
秋衣是月獵潢河 四年二月獵塔魯河

臣等謹按帝紀自是獵平地松林者二  
五年七月  
八年七月

獵黑嶺者二

六年七月  
七年四月

又統和元年十月觀漁塔

瑪灤十二月漁濬淵四年正月觀漁土河七年十  
一月釣魚於沈子灤十四年正月漁於潞河十五  
年十二月釣魚土河二十三年十一月觀漁桑乾  
河二十七年正月釣魚土河開泰二年七月釣魚  
曲溝太平二年正月如納水釣魚三年正月復如  
之俱附錄焉

興宗重熙元年二月大蒐七月獵平地松林 四年七

月朔獵於黑嶺 五年九月獵黃花山

獲熊三十六  
賞獵人有差次月

幸南京御元和殿以日射三  
十六熊賦幸燕詩賜進士

六年四月獵野孤嶺閏

四月獵龍門縣西山 七年四月獵白馬塢射鹿新淀

井又獵金山 十三年正月獵烏爾袞岡

時翰林都林牙無修國史蕭罕嘉努每見帝獵未嘗

不諫會有司奏獵秋山熊虎傷死數十人罕嘉努書

於冊帝見命去之罕嘉努既出復書他日帝見之曰

史筆當如是帝問罕嘉努我國家創業以來孰為賢

主罕嘉努以穆宗對帝怪之曰穆宗嗜酒喜怒不常  
視人猶草芥卿何謂賢對曰穆宗雖暴虐省徭輕賦  
人樂其生終穆之世無罪被戮未有過今日秋山傷  
死者臣故以為賢帝默然

臣等謹按遼史蕭罕嘉努傳不載年月今以游幸表  
考之十四年七月獵黑嶺九月獵平山殆其時也  
十六年自七月至於九月日射獵於楚布溝錫喇錫倫  
石塔諸山 十七年閏正月射虎於哈里吉 十八年

正月獵拜塔山 二十一年射虎於南薩哈巴 二十

二年四月獵鶴淀 二十三年正月獵雙子淀又獵盤

直淀四月獵哈喇噶扎爾九月獵

遇二虎縱  
犬獲之

臣等謹按帝紀重熙八年正月如混同江觀魚復

叉魚於實然里河十年七月詔諸帳郎君等於禁

地射鹿決三百不徵償小將軍決二百以下及百

姓犯者罪同郎君論九月皇太后射獲熊帝進酒

為壽獵馬盂山草木蒙密恐獵者誤射傷人命耶

律德古各書姓名於矢以志之附錄於此

道宗清寧四年七月獵於黑嶺 八年七月射熊於愛

實拉

臣等謹按帝紀二年四月詔方夏長養鳥獸孳育之時不得縱火於郊七年四月禁吏民畜海東青鵠又遊幸表十年七月獵赤山以皇太后射獲大鹿梁王濬遇十鹿射之得九帝大喜設宴者二今以宗室傳考之濬六歲封梁王明年從獵矢連發



三中又射十獲九正與之合此可補紀所未載

咸雍元年七月以皇太后射獲熊賞賚百官有差

先是四月

清暑國古勒當即其地

十月幸盤巫閣山皇太后射獲虎大宴羣

臣全各賦詩

四年正月獵炭山 六年七月獵於和羅努

克特 八年閏七月射熊於殺羊山 九年七月獵大

熊山 太康元年七月獵平地松林 二年八月獵

過麋

失其母憫之不射

五年七月獵夾山 六年七月獵沙嶺

七年八月射鹿赤山 九年七月獵馬尾山九月射熊

欽定四庫全書

卷九十一

於白石山 大安四年十月獵遼水之濱 五年四月

獵北山 八年四月獵西山

臣等謹按帝紀獵黑嶺炭山西山不一而足尤以沙嶺為最多今不備載自後壽隆年間所獵處皆屬重見故亦闕焉又若清寧四年如鴨子河釣魚咸雍三年正月如鴨子河御安流殿釣魚太康元年以獲鷲加鷹坊使耶律楊魯工部尚書五年三月以宰相耶律仁傑獲頭鷲加侍中姑附錄之

天祚帝乾統二年七月獵黑嶺

以霖雨給獵人馬明年以獵人多亡嚴立科禁

四年正月獵木嶺七月獵南山 五年四月射虎炭

山 六年七月獵鹿角山 七年十月獵暨巫閭山

九年七月獵於哈爾吉 十年四月獵於北山 天慶

元年七月獵 二年九月獵獲熊

燕犀臣

三年正月獵

狗牙山

大寒獵人多死

四年七月射鹿於慶州 五年七月

獵於托里嶺東

臣等謹按帝紀天慶四年射鹿慶州時金兵攻寧

江州帝畧不介意今以列傳考之先是幸混同江  
界外酋長在千里外者以故事朝行在適頭魚宴  
帝臨軒命次第起舞為樂獨阿古達辭以不能再  
三諭之不從帝怒謂樞密使蕭奉先曰跋扈如此  
可托邊事誅之奉先謂殺之傷向化心乃止其弟  
烏奇邁納罕呼遜等嘗從獵能呼鹿刺虎搏熊帝  
喜輒加官爵金太祖歸遂舉兵又其時殿前副檢  
點蕭呼圖克從天祚東征凡隊伍皆以圍場名號

之見好游畋每言從禽之樂以逢帝意悅而從之  
故自五年至十年及保大元年無歲不獵然不足  
為典制無庸書矣

### 臘獵儀

穆宗應歷二年臘以十二月辰日前期一日詔司獵  
官選獵地其日皇帝皇后焚香拜日畢設圍命獵夫  
張左右翼司獵官奏成列皇帝皇后升輦多囉倫穆  
騰以酒二尊盤飧奉進北南院大王以下進馬及衣

皇帝降輿祭東畢

國俗凡祭皆東向曰東祭

乘馬入園中皇太子

親王率羣官進酒分兩翼而行皇帝始獲免羣臣進酒上壽各賜以酒至中食之次親王大臣各進所獲及酒訖賜羣臣飲還宮自是遂以為常儀統和中罷之

四時已納儀

春曰鴉子河灤

灤東西二十里南北三十里在長春州東北三十五里四面皆沙碛多榆

柳杏林

皇帝正月上旬起牙帳約六十日方至天鷲未

至卓帳冰上鑿冰取魚冰泮乃縱鷹鵠捕鵠鴈皇帝  
每至侍御皆服墨綠色衣各備連鋌一柄鷹食一器  
刺鷹錐一枚於灤周圍相去各五七步排立皇帝冠  
巾衣時服繫玉束帶於上風望之有鷹之處舉旂探  
騎馳報遠泊鳴鼓鵠驚騰起左右圍騎皆舉幟麾之  
五坊擎進海東青鵠拜授皇帝放之鵠擒鵠墜勢力  
不加排立近者舉錐刺鷹取腦以飼鵠救鵠人例賞  
銀絹皇帝得頭鵠薦廟羣臣各獻酒果舉樂更相酬

酢皆插鷺毛於首以為樂賜從人酒遍散其毛弋獵

網釣春盡乃還

歲時釣魚得頭魚亦置酒張宴與頭鵝宴同

夏無常所多在吐兒山

道宗每歲先幸黑山拜聖宗興宗陵賞金運乃幸子河避

暑吐兒山在黑山東北三百里近饒頭山黑山在慶州北十三里上有池池中有金蓮子河在吐兒山東北三百里懷州西山有清涼殿亦為行幸避暑之所四月中旬起牙帳卜吉地

為納涼所五月末旬六月上旬居五旬與北南臣僚

議國事暇日遊獵七月中旬乃去

秋曰伏虎林

林在永州西北五十里嘗有虎據林傷害居民畜牧景宗領數騎獵馬虎在草



際戰栗不敢仰視  
帝舍之因號伏虎

七月中旬自納涼處起牙帳入山

射鹿及虎每歲車駕至皇族而下分布灤水側伺夜  
將半鹿飲鹽水令獵人吹角效鹿鳴既集而射之謂  
之舐齏鹿又名呼鹿

冬曰廣平淀

在永州東南三十里本名白馬淀東西  
二十餘里南北十餘里地近坦夷四望

皆沙磧木  
多榆柳

其地饒沙冬月稍暖牙帳多於此坐冬與

北南大臣會議國事時出校獵講武兼受南宋及諸

國禮貢

牙帳之制

以檜為硬寨用毛繩連繫每檜下黑氈傘一以庇衛  
士風雪檜外小氈帳一層每帳五人各執兵為禁圍  
南有省方殿殿北約二里曰壽寧殿皆木柱竹棟以  
氈為葢彩繪韜柱錦為壁衣加緋繡額又以黃布繡  
龍為地障牕榻皆以氈為之傳以黃油絹基高尺餘  
兩廂廊廡亦以氈葢無門戶省方殿北有鹿皮帳帳  
次北有八方公用殿壽寧殿北有長春帳衛以硬寨

官用契丹兵四千人每日輪番千人祇直禁園外卓  
槍為寨夜則拔槍移卓御寢帳周圍拒馬外設鋪傳  
鈴宿衛每歲四時周而復始

金太祖收國元年三月朔獵於寥晦城 二年九月獵

近郊

熙宗皇統二年正月獵於來流河十二月獵於和約爾

瑪勒路

四年九月畋於沙河

射虎獲之

十一月獵於海島

六年正月獵於梅稜是月如春水

帝從禽藻騎悞入  
大澤中帝馬陷因

步出亦不  
罪藥者

九年十一月獵於塔爾琿屯

時右諫議大夫程采上疏畧曰殿前點檢司古殿巖  
環衛之任所以肅禁藥尊天子備不虞也臣幸得近  
清光從天子觀時畋之禮比見羽衛從臣無貴賤皆  
得執弓矢馳逐而駕乃崎嶇沙磧之地加之林木叢  
鬱易以迷失是日自郊及中百官始出沙漠獨不知  
車駕何在瞻望久之始有騎來報皇帝數騎已至行  
在竊惟古天子出入警蹕清道而行至於楚畋雲夢

漢獵長楊皆大陳兵衛以備非常今膺祖宗付託之  
重奈何獨與數騎出入林麓沙漠之中前無斥堠後  
無羽衛甚非備不虞之意也願預戒有司圖上獵地  
具其可否然後下令擇衝要稍平地為駐蹕所簡忠  
義爪牙之士統以親信腹心之臣警衛左右俟麋鹿  
既來然後馳射仍先遣搜閱林數明立幟幟為出入  
馳道不然恐貽宗廟社稷之憂帝嘉納之至八年閏  
八月宰臣以西林多鹿請獵帝恐害稼不允

海陵天德三年正月帝出獵二月還宮十二月獵於近

郊四年五月獵於伊拉齊山

賜獵士人一羊

八月朔獵於札

紐山貞元元年十月獵於良鄉正隆六年三月次

河南府因出獵四月次溫湯獵

奔鹿突之墮馬嘔血數日

臣等謹按海陵紀獵近郊者凡五如十二年既獵

近郊矣貞元二年九月癸亥乙亥三年十一月辛

未正隆四年十月乙亥俱獵近郊又貞元元年八

月禁中都路捕射麋鹿五年十二月禁中都河北

山東河南河東京兆軍民網捕禽獸及畜養雕隼  
者六年正月詔自中都至河南府所過州縣調從  
獵騎士二千二月禁扈從縱獵擾民附錄之

世宗大定二年九月獵於近郊 三年九月秋獵十月

冬獵十二月臘獵於近郊

以所獲薦山陵  
自是歲以為常

四年二月

獵於高陽之北十月朔獵於密雲縣 六年六月獵於

銀山八月獵於望雲之南山十月如安肅州冬獵 十

年七月獵於柳河川

放圍場役夫勅扈從人縱畜牧  
蹂踐禾稼者杖之仍償其直

十一年九月獵於橫山 十四年八月獵於瑪哩布

十九年十一月如河間冬獵 二十五年六月獵近山

見田隴不治  
命筈田者

二十九年 時章宗  
己即位 六月以修起居注完

顏烏哲知登聞檢院孫鐸皆上書諫罷圍獵納之 十二  
月諭

有司女直人及百姓不得用網捕野物及  
故羣鵬枉害物命亦恐女直人廢射也

金史焦旭傳曰二十九年九月獵於近郊監察御

史焦旭劾奏太傅克寧右丞相襄不應請車駕田

獵帝慰諭之為罷獵



臣等謹按帝紀自三年秋獵冬獵臘獵後自是歲  
以為常故不悉書又三年八月勅殿前都點檢唐  
古德溫重九出獵國朝舊俗今扈從軍三千不無  
擾民可嚴為約束仍以錢萬貫分賜之九年三月  
定網捕走獸法帝命犯者杖而釋之十六年正月  
帝按鷹高橋見道側醉人墮驢而卧命左右扶而  
乘之送至其家二十五年五月平章政事襄奉御  
平山等射懷孕兔帝怒杖平山三十召襄誠勅之

欽定四庫全書

卷九十一

遂詔禁射兔十月禁上京等路大雪及含胎時採

捕十一月朔詔射未祭獸不許採捕冬月雪尺以

上不許用網及蘇克蘇呼恐盡獸類附錄於此

章宗明昌元年十月獵於近郊十一月冬獵

免獵地今年租

三年九月獵秋山

亦有免稅等事已見巡狩門

四年二月獵於姚

村淀

五年六月自冰井出獵

登呼圖哩巴山酌酒再拜

七月又獵

於和濟格爾

一天貫雙鹿是日復鹿二百二十二賜扈從官有差又次隆和薩巴帝親射獲黃羊

四百七十一

承安三年八月獵於香山十二月朔獵於酸

聚林

大風寒  
罷獵

泰和三年十一月冬獵

以獲兔  
爲山林

臣等謹按帝紀明昌元年正月制諸王任外路者  
許遊獵五日過此禁之仍令戒約人從毋擾民二  
月遣諭諸王凡出獵毋越本境三年二月勅明安  
穆昆許於冬月率所屬戶畋獵二次每出不得過  
十日六年二月勅有司行宮側及獵所有農者勿  
禁泰和元年正月以方春禁殺含胎鹿五年七月  
定圍場誤射中人罪所宜附錄若獵於近郊則歲

以為常不贅錄矣

又按章宗勅有司行宮側及獵所有農者勿禁恭  
繹

御批通鑑輯覽曰章宗以圍獵之地悉與民耕則講武因  
之而廢觀帝平日措施都以典章文物為急未免近於  
好名而於詰戎肆武之道棄之如遺遂盡變金源舊風  
國勢日就孱弱子孫不能承祖父基緒致家法因之而  
隳雖有善政矣足道哉此可為守成之主垂戒矣

衛紹王大安二年十一月獵於近郊

宣宗元光元年十月獵於近郊

先是貞祐二年九月禁軍官圍獵三年九月以秋稼未獲亦如之至是詔免百官送迎且勿令治道以勞百姓二年十月制行樞密院及元帥府農隙之月分番巡獵校獵月不過三次

哀宗正大四年十一月獵於近郊

六年十二月罷附京獵地百里聽民耕稼

元太宗五年八月獵於額伯蘓地 九年春獵於齊齊

克察罕之澤十月獵於野馬川

幸龍庭遂至行宮

憲宗四年春獵於齊齊克察罕冬大獵於哈喇諾海之北

七年五月皇子阿實達因獵獨騎傷民稼帝見讓之  
遂撻近侍數人由是秋毫不敢犯云

世祖至元十四年八月車駕畋於上都之北 十八年  
九月朔畋於近郊

臣等謹按帝紀自此獵近郊每歲如之若禁京畿  
田獵則自中統三年十月始嗣是至元元年三年  
四年俱申嚴之九年十月勅自七月至十一月終  
聽捕獵餘月禁之十年九月禁京畿五百里內射  
獵十六年三月詔禁歸德亳壽臨淮等處田獵六  
月禁已延徽爾等峪寨捕獵十八年五月禁高麗  
全羅等處田獵擾民者十九年三月禁益都東平  
沿淮諸郡軍民官捕獵二十二年七月詔禁捕獵

二十三年十一月勅禽獸字孕時毋畋獵二十四  
年正月禁輝和爾地禽獸孕孳時田獵二十五年  
二月勅江淮勿捕天鵝三月禁捕鹿羔二十七年  
九月申嚴漢人田獵之禁二十八年九月禁宣德  
府田獵十月詔嚴益都般陽泰安寧海東平濟寧  
田獵禁二十九年禁杭州放鷹是也若聽捕獵則  
自至元十年九月遼東饑弛獵禁始旋勅自今秋  
獵鹿豕先薦太廟嗣是十二年十月弛北京義錦



等處獵禁十四年八月弛蓋州獵禁十九年十月  
以歲事不登聽諸軍捕獵於汴梁之南二十五年  
正月弛遼陽漁獵之禁惟毋殺孕獸二月弛漁漂  
禁二十八年四月弛杭州西湖禽魚禁聽民網罟  
十一月武平平濩諸州饑弛獵禁其孕字之時勿  
捕是也今類記之

成宗大德元年三月畋於柳林 二年二月畋於潞州  
臣等謹按帝紀大德元年三月禁上都正月至七

月捕獵大都八百里內亦如之八月命諸王阿濟格自今出獵悉自供其無傷民力十一月詔自今田獵始自九月閏十二月以淮東饑弛湖泊禁仍聽正月捕獵五年十月以歲饑聽民捕獵七年五月禁諸王班布爾實部於般陽等處圍獵擾民十一月命鷹師圍獵毋得擾民

武宗至大三年八月獵於昂哈淖爾之地

臣等謹按帝紀多禁田獵如至大元年七月禁鷹

坊於大同隆興等處縱獵擾民十月禁奉符長清  
泗水章邱霑化利津無棣七縣民田獵十一月罷  
益都諸處合勅赤等狩獵三年十一月以益都寧  
海等處連歲饑罷鷹坊縱獵其餘獵地並令禁約  
以俟秋成皆其事也

又按仁宗紀至大四年帝已即位十二月詔曰今  
歲不登民何以堪春蒐其令勿供億又申禁漢人  
持弓矢兵器田獵皇慶元年五月諸王托斯和默

色以農時出獵擾民勅禁止之自今十月方許出獵延祐二年四月駕幸上都宣徽院以供尚膳遣人獵於歸德勅以其擾民特罷之三年正月以真定保定薦饑禁畋獵三月禁天下春時畋獵史稱帝澹然無欲不事遊畋豈不信歟

英宗至治元年二月畋於柳林

三年二月亦如之

泰定帝泰定三年八月次中都畋於翁果察圖之地

先是二年正月以畿甸不登罷春畋至致和元年正

月將畋柳林御史王獻等以歲饑諫帝曰其禁衛士  
毋擾民家命御史二人巡察之

臣等謹按文宗紀天曆二年正月詔罷今歲柳林  
田狩餘無田獵事可見

順帝至元三年正月帝獵於柳林

先是元年二月將畋於柳林御史臺諫曰陛下春秋  
鼎盛宜思付託之重致天下於隆平況今赤縣之民  
供給繁勞農務方興而馳騁冰雪之地倘有銜檠之

虞奈宗廟社稷何遂止至是獵其地凡三十五日監  
察御史實迪宋紹明進諫帝嘉納之賜金幣固辭帝  
曰昔魏徵進諫唐太宗未嘗不賞汝其受之四年二  
月復獵於柳林

臣等謹按帝將畋於柳林因臺諫而止恭繹

御批通鑑輯覽曰蒐苗獮狩古所不廢況田獵足以肄  
武在元時亦其國俗所尚順帝春秋方盛正當因此  
習勞而車駕所經並可以周知民隱於政務又何妨

乎臺垣狃於書生庸瑣之見借名諫獵以弋取直聲  
帝聞言即止蓋其心本好逸而惡勞適臺諫有言遂  
陽以博納善之稱而陰以遂便安之計其後賜寶迪  
等金幣且欲妄擬貞觀益可見其意所假托然亦何  
救其內多欲而覆宗社哉

睿論所及不獨直揭順帝晏安耽毒之失其所以為  
萬世人主訓者至深遠矣

明成祖永樂十年十月獵城南武岡 十三年十月獵

於近郊 二十年五月獵於偏關

時以親征阿魯台至其地

宣宗宣德四年十月獵於峪口

五年十月獵於全道

九年九月度居庸關自全道至洗馬林大獵

英宗天順二年十月獵南海子

苑在京城南二十里方一百六十里苑中有按鷹臺

臺旁有三海皆元之舊也明闢四門繚以周垣獐鹿

雉兔甚多海戶千餘守之自永樂定都後歲時蒐獵

於此亦所以訓武也是日帝親御弓矢命勲戚武將



應詔馳射獲輒以獻既畢賜酒饌以所獲分賜從臣而歸


武宗正德十二年正月南郊遂獵於南海子

夜中還御殿受朝賀

次年正月至自宣府罷南郊致齋越三日大祀遂獵於南海子明年二月亦如之

臣等謹按帝紀十四年十一月漁於清江浦十五年九月漁於積水池舟覆救免附錄於此史氏謂耽樂嬉游難免訾議是也然是後自嘉靖至崇禎

凡百有二十餘年絕無田獵事可見則又非古者  
農隙講武之遺意矣



欽定續文獻通考卷九十一